

1 Samuel

Samuelja Israel ñoquian'suve can'jensi aindeccu ññajan'fa ande na'suve cuintsu cca'i'su andea'caen tise'pama mandaye. Na'su Chiga anttesi Samuelja Saúlma feti na'suve. Tsa'ma Saúlja Na'suma ñotsse pañambisi Na'su Chigaja Davidma in'jamba attufaensi Samuel omboe tisema'qqe feti. 1 Samuel tevaen'jen tsu pa'cco Saúl paya'ngae tson'chone condase'cho.

Ana du'shuve isuye antte'cho

1 ¹Israel ande'su Efraín aindeccu can'jen'cho ccotta'cconi tsu Ramá canqqe jin. Tseni tsu can'jen Zuf antiandeccu'su a'i tise inise Elcana. Tsa Elcana tsu Jeroham dutssi'ye. Tise yaya ccashe'ye tsu Eliú. Eliú yaya tsu Tohu. Tohu tsu ñoa'me Zuf dutssi'ye. Nane poiyl'cco tsu israe'su Efraín aindeccu'su.

²Elcanajan dos pusheve an'bian. Fae'cco tsu Ana; faesu tsu Penina. Tsa Peninajan du'shupa. Tsa'ma Anajan du'shu me'cho canse. ³Poi canqqe'fa Elcanajan tisu in'janquua'caen tisu canquene sombopa Siloni japoen. Tseni Chigama ññajamba jongoesuma oque oraemba afeye Osha'choma Oshacho Na'su Chiganga. Tse'tti tsu Chigama afa'su na'su Elí dutssiyendeccu, tsa Ofni toya'caen Finees, can'jen'fa. Tsendeccu'qqe tsu Na'su Chigama afasundeccu.

⁴Elcanajan tsa'caen jongoesu añña'choma oque oraemba Chiganga afepa tsa'su nama Peninanga toya'caen poiyl'cco tsambe tsandie du'shu, pushesu dushundeccunga'qqe afe. ⁵Tsa'ma Anama ñoa'me ñotsse in'jamba tisengaja ti'tsse injan'tsse afe. Nane Na'su Chiga Ana du'shuve isuye anttembi'ni'qqe toya tsu Elcanajan Anama ti'tsse in'jan. ⁶Tsa'cansi Peninajan Anama iyicca'yepa tisema noñangiamba fe'ña. Nane ansangiañe tsu in'jan Na'su Chiga tise du'shuve isuye anttembisi.

⁷Tsa'camba poi canqqe'fa Na'su Chiga ettini japa Peninajan tsa'caeñi Anama noñangian. Tsa'caen tsinconsi Anajan i'namba añe chi'ga. ⁸Tsama attepa tise tsa'ndu Elcanajan su: “Ana, ¿jongoesie qui i'na? ¿Jongoesie qui ñombi'yepa añe chi'ga? ¿Na quema chonga dushundeccuve an'bia'ma'caen injan'chota ti ñotssimbi?”

⁹Ccase japa Siloni can'jemba poiyl'cco an nanimba Anajan jangipa Na'su Chiga ettini ja. Chigama afa'su na'su Elíja Chiga etti'su sombo'tti jin'tti siyetani dyaipa Anama atte. ¹⁰Nane Anajan i'namba injama'cho tsosipie ñombi'yepa

Na'su Chigama ñajan. ¹¹ Ñajamba Na'sunga ñoa'me su'chove qqen afa: “Na'su Chiga, que qui Osha'choma Oshacho. Ña quema shondo'suma injan'jemba ñoa'me mende'yepa tsandie du'shuve ñanga afe'ninda gi tsamajan toequi quenga ccase afeya. Afesi tsu quema shondo'suve dapa canseya. Toya'caen tise tosema cha'ttumbeyi tsu canseya'cho tiseja quembe qqen canjaeñe.”

¹² Tsa'caen Ana bia'ave Na'suma ñajan'jensi Chigama afa'su Elíja aya'fa oya'je'choma atte. ¹³ Nane Anajan injama'cho tsosipie in'jamba pa'ña'tsse afambe'yi Chigama ñajan'jen. Tsa'caen ñajan'jemba aquia aya'fayi oya'je. Tsa'cansi Elíja “Ccusi tsu” qqen in'jamba ¹⁴ su:

—¿Mi'ng'e qui ccusijeya? ¡Tsangaeyi antteja vinoma!

¹⁵ Tsa'ma Anajan su:

—Tsa'cambi gi, na'su. Nane vino ni tse'tse'pama cu'imbi gi. Tsa'ma injama'cho tsosipie ñombi'yepa gi pa'cco ña injama'cho in'jan'choma Na'su Chiganga conda'je. ¹⁶ Tsa'cansi ñama ega pushesu qqen in'janjama. Nane cca'i'ccu can'jemba ñoa'me ñombi'yepa vana'jemba gi vani jipa asi'ttaemba Na'su Chigama ñajan'can'jen.

¹⁷ Tsonsi Elíja su:

—¡Ñombi'yembe japa canseja! Isha tsu Israelmbe Chigaja que in'jamba ñajan'choma afeya.

¹⁸ Tsa'caen susi Anajan “Chigatsuafepeañán” qqen supa ja. Sombopa tise'pa can'jeni japa an. Ccattsse ñombi'ye can'jembi. ¹⁹ Ccaqui a'ta sinte'yi jangipa Na'su Chigama ñajan'fa. Ñajan nanimba toequi tise'pa Ramá canque'su tsaoni ja'fa. Can'jemba Elcana Anai'ccu fae'ngae can'jensi Na'su Chigaja Ana ñajan'choma in'jan. ²⁰ In'jansi Anajan surie da. Isuya'cho nepisi Anajan tsandie du'shuve isu. Isupa tisema inisian Samuelve. Nane Samuel quenda tsu “Na'su Chiganima ñajan'cho” qqen su.

²¹ Omboe Elcana, tise pushe Penina, tise dushundecui'ccu tise poi canque'fa Chiganga afe'choma afeye, tise Chiganga suya'choma'qqe tsoñe ja. ²² Tsa'ma Anajan jambe shanda tise tsa'ndunga qqen supa:

—Du'shu toya chochoma anttembicho'ama angaya'bi gi. Tsa'ma chochoma anttesi gi Chigai'ccu cachuicco'je'ttinga angapa tseni tisema antteye cuintsu tsangae Na'su Chigama shondo'suve daye.

²³ Tsa'caen susi tise tsa'nduja su:

—Que in'janquia'caen tsonjan. Nane ronda'jeja du'shu chochoma anttesi que Na'su Chiganga su'chove tsoñe.

Tsa'caen susi Anajan tsaoni can'jemba du'shuma coirapa coeña chochoma antteya'ngae. ²⁴ Tsa'caen chochoma anttesi toya du'shuveyi tise chanjan tisema anga Siloni. Tsa'caen jayipa tres vaura quitsaye du'shu, veinte y dos litro harina, fae ttono botiya vinoma'qqe tseni Na'su Chigai'ccu cachuicco'je'ttini anga. ²⁵ Tseni nepipa fae vaura quitsaye du'shuma Chiganga afeye fi'tti. Tsama fi'ttisi Anajan du'shuma na'su Elíni ²⁶ angapa su:

—Na'su, ñanda tayoe que dyai'cho pporotsse ccutsupa Chigama ñajan'su pushesu gi. ²⁷ Va du'shuve Chigama ñajansi tsu Na'su Chigaja

ñama pañamba ña ññajan'choma ñanga afe. ²⁸Tsa'caen afesi gi ccane'qqe tisema Na'su Chiganga afe cuintsu paya'ngae tisema shondoye.

Elíja tsama pañamba puntssamba Chigama ññajan.

2 ¹Toya'caen Ana'qqe Chigama ññajamba settapoen. ¹¹Settapoen nanimba tise tsa'ndu Elcanai'ccu toequi Ramá canqqueni ja'fa tise'pa tsaoni. Tsa'ma du'shuja Na'su Chigama shondoye shanda, Chigama afa'su na'su Elíma pañamba.

Na'su Chiga Samuelma ttu'se'cho

3 ¹Du'shu Samuelja tsa'caen Elíma ñotsse pañamba Na'su Chigama shondó can'jen. Tsaite Samuel can'jeinte Na'su Chigaja a'inga zutsse afa'jembi. Nane zutsse attiambi a'ima in'jaeñe. ²⁻³Tsa'cansi fae cose Elí tayo ccuipa ana'jen. Nane Elíja tayo coenzapa atteye oshambi'tsse dasi Samuelja tsa Na'su Chiga a'i'ccu injancco'fa'cho cafon ccutsu'cho carpani can'jen. Tsa'caen can'jemba toya Chigai'ccu cachuicco'je'tti'su ñño chanjun'jen'ni anañe ccuisi ⁴Na'su Chigaja Samuelma ttu'sepa su:

—¡Samuel!

Ttu'se'choma pañamba Samuelja su:

—¡Va'tti gi can'jen!

⁵Tsa'caen supa jangipa Elíni buttopa japa su:

—Tayo gi ji. ¿Jongoesie qui ñama ttuse'je?

Tsa'ma Elíja su:

—Me'in, ññajan quema ttu'se'jembi. Toequi japa ccuija.

Tsonsi Samuelja japa ccase ccui. ⁶Ccuisi ccase Na'su Chigaja tisema ttu'se:

—¡Samuel!

Tsonsi ccase Samuelja jangipa Elínga catsepa su:

—Tayo gi ji. ¿Jongoesie qui ñama ttuse'je?

Tsa'ma ccase Elíja su:

—Me'in, jaricho, ññajan quema ttu'se'jembi. Toequi japa ccuija.

⁷Nane toya tsu Samuelja atesumbi Na'su Chiga tsa'caen a'i'ccu condaseqqe'suve minguite'qqe tsa'caen pañamba cansembi'pa. ⁸Tsa'ma ccase tres se Na'su Chiga tisema tsa'caen su'jesi ccase jangipa Elínga catsepa su:

—Tayo gi ji. ¿Jongoesie qui ñama ttuse'je?

Tsa'caen susi Elíja in'jan Na'su Chiga tsa du'shuma ttuse'je'chove.

⁹In'jamba Samuelma su:

—Japa ccuija. Ccase Na'su Chiga quema ttu'se'ninda qqen suja: 'Afaja. Ñña quema shondo'su gi quema paña'jen.'

Tsonsi Samuel japa tise ana'jen'chonga ccui. ¹⁰Ccuisi ccase Na'su Chigaja tayo'caen ji ccutsupa ttu'se:

—¡Samuel! ¡Samuel!

Ttu'sesi Samuelja pañamba su:

—Afaja. Ñña quema shondo'su gi quema paña'jen.

¹¹Tsonsi Na'su Chigaja su:

—¡Ñotsse pañajan! Ña Israel andeni tsoña'choma pañamba tsu aindeccuja bo'yo'e dapa can'boen ccutsu'faya. ¹²⁻¹⁴Nane tayo gi Elínga conda tise'pa injama'choma somboeña'chove. Tise dutssiyendeccu ñama afasepa egae tsinconsi tsendeccuma tansiambipa tsu tise'qqe shacapa. Tsa'cansi gi tsequi a'ta pa'cco ña vanaeña'chove tise'panga suqquia'caen tsoña. Nane anttembe'yi tise ma vanaesi ni Chiganga afe'cho ni jongoesuma fi'ttipa oque oraen'jen'cho'qqe tise'pa egae tsincon'choma joqqitssiaña'bi. Tsangae tsu tsa'caen jinchoya.

¹⁵Na'su Chiga tsa'caen condasesi Samuelja ccu'í a'ta. A'tasi jangipa Na'su Chiga a'i'ccu cachuicco'je'tti'su sombo'tti piccofin'dima fetta. Tiseja dyojopa Chiga susi paña'choma Elínga condambi. ¹⁶Tsa'ma Elí tise ma ttu'sepa su:

—¡Jaricho Samuel!

Ttu'sesi Samuelja su:

—Va'tti gi can'jen.

¹⁷Tsonsi Elíja qqen iñajampaña:

—¿Jongoesu qqen tsu Na'su Chigaja quenga conda? Chigáne a'tiembe'yi pa'tssima ñanga condaja. ¡Nane jongoesu qqen tise su'choma a'tiemba ñanga condambi'ninda cuintsu Chigaja quenga'qqe tise suqquia'caen tsomba ti'tsse quema vanaejan!

¹⁸Tsa'caen susi Samuelja pa'tssi Chiga su'choma tisenga conda. Condasesi Elíja su:

—¡Chiga tsu Na'su! ¡Ma'caen tise in'janquia'caen tson'jenjan!

¹⁹Samuel coenjinsi Na'su Chigaja tise ma fuite'je. Toya'caen pa'cco tise su'choma tson. ²⁰Tsa'caen tsonsi poi israendeccu, nane Dan canqqe'ye Beerseba andeni canjensundeccu'qqe in'jan'fa Chiga ñoa'me Samuelma ttu'sepa tise ma afa'suve tson'choma. ²¹Toya'caen Na'su Chigaja Siloni jipa attian'ñaccapa tise in'jan'choma Samuelnga conda'je.

4 ¹Tsa'caen condasesi pañamba Samuelja poi israendeccunga condase'je.

Filisteondeccu Israelma patsu'fa

Omboe tsu filisteondeccuja israendeccui'ccu iyiccoye bopa ji'fa. Jipa tsu Afecni tise'pa carpama ccutsutsian'fa. Tsonsi tsu israendeccu'qqe bopa iyiccoye sombo'fa. Nane sombopa Eben-ezerni tise'pa carpama ccutsutsian'fa. ²Tsonsi iyiccoya'chove ñoñamba filisteondeccuja israendeccui'ccu iyiccoye ashaen'fa. Tsa'caen iyiccopa israendeccuma patsu'fa. Nane cuatro mil israel'su sundarondeccu tsu tseni tise'pa iyicco'je'cho sinjuncuni pa'fa.

Toya'caen filisteondeccu tsu Chiga a'i'ccu injancco'fa'cho cafonma itsapa anga'fa. Tsa'ma tisu andeni angapa an'biamba osha'cho paqqe'sui'ccu vana'jen'fa. Tsa'camba vaura qqitssa'je'cho caronga otsiamba toequi moe'fa Israel andeni.

Samuelja ñoquian'suve da'cho

7 ³Tsonsi Samuelja poiysi'cco israendecunga conda: “Que'i pa'cco injama'choi'ccu ñoa'me toequi Na'su Chiganga jiye in'jan'da que'i ñoña'cho chigama cati'faja. Toya'caen Astartéma ñoña'cho chigama'qqe tsu cati'faya'cho. Tsesuma catipa tsu pa'cco tisu injama'choi'ccu tisu Chigaveyi in'jamba shondoya'cho. Tsa'caen tson'ninda tsu Na'suja que'ima ccushaëña filisteondeccu'ye.”

Israendeccu ande na'suve iñajan'fa

8 ¹Tsomba tse'i Samuel coenza ccashe'yeve dapa tise dutssiyendeccumca ca'nia israe'su ñoquiansundeccuve. ²Nane tise aishe dutssi'ye tsu Joel. Tse'tti'su tsu Abías. Tsendeccu tsu Beersebani can'jemba israendeccumca ñoquian'jen'fa. ³Tsa'ma tsendeccuja tise yaya Samuelcan'fambi. Nane ñotsse ñoquiambi'pa panshaen corifin'dive in'jamba egae tsincon'fa. Iyiccosundeccu jipa majan tise'panga ti'tsse corifin'dima afe'ninda tsu tsane ñotsse afa'fa. ⁴Tsa'caen tson'jen'fasi poi israe'su coenzandeccu bopa Ramáni jipa Samuelnga ⁵su'fa: “Queja ñoa'me coenza ccashe'yeve dasi que dutssiyendeccu ñoquiansundeccuve dapa ja'ñojan quia'caen tson'jen'fambi. Tsa'cansi majama ttu'sepa ca'nianjan ñoa'me ande na'suve. Nane tsa'caen tsu faesu ande'su aindeccuja atesu'fa.”

⁶Tsa'caen ande na'suve iñajan'fasi Samuelja in'jambipa ñombi'ye. Ñombi'yepa Chigama iñajan. ⁷Tsa'ma Na'su Chigaja Samuel iñajan'choma pañamba su: “Ma'caen tise'pa in'jan'ninda tsa'caen tsonjan. Nane quema chi'gambipa ñoa'me ñama tsu chi'ga'fa. In'jan'fambi tsu ña tise'pama manda'jeye. ⁸Egipto'ye ña tise'pama somboeinte chi'gapa ja'ñoa'ngae tsu ñama chi'gapa faesu chigandeccuve ttatta'je'fa. Nane ñanga tsonquua'caen tsu ja'ño quenga tson'jen'fa. ⁹Tsa'cansi tise'pa in'janquua'caen tsonjan. Tsa'ma toyi'te que in'jambi'choama tise'panga condapa, ande na'suve dapa ma'caen mandaya'choma'qqe condaja.”

¹⁰Tsonsi Samuelja Na'su Chiga su'choma ande na'suve iñajansundecunga conda ¹¹qquen supa:

—Qquen tsu ande na'suja que'ima mandaya: Sundarondeccu tsu que dutssiyendeccumca ttu'seya cuintsu majandeccu cavayo'su sundaro, majandeccuja cavayo caro'su sundarove da'faye. Toya'caen tsu majandeccumajan tisema coira'su sundarondeccu tsoña. ¹²Toya'caen tsu majama ca'niaña sundaro capitánme, majama sargentove. Majan que'i'suma tsu mandaya tise andema semañe, toya'caen tise anque'suma taiye. Faesundeccumca tsu mandaya geraenque'su matichi, dansan'cho toya'caen gera'su cavayo carove cuintsu ñoña'faye. ¹³Toya'caen tsu que'i onquengendeccumca ttu'seya tise'be shoccoen'su, panme matssan'su toya'caen ñome'bama ñoña'suve ca'niañe. ¹⁴Que'imbe bove ñotssia nasipa, tsajaccu toya'caen olivoccumca'qqe tsu itsaya tisema shondosundecunga attufaëña. ¹⁵Nane que'i trigo toya'caen olivoma

tai'je'cho'suma tsu fae chongayi'cho'ccove itsaya tise sundaro nasundecunga toya'caen tisema shondosundecunga'qqe afeye. ¹⁶Toya'caen que'imbe sema'su tsandiencu, sema'su pushesundecuma'qqe, itsapa tsu que'imbe bove ñotssia sema'su vaura, que'i boroma'qqe tise'be semasundecuve ca'niañe. ¹⁷Nane que'i oveja'suma fae chongayi'cho'ccove tisumbe isupa tsu que'iveyi semoña. ¹⁸Tsequi a'ta qui que'lja i'na'faya que'i in'jamba ñajan'cho ande na'su tsa'caen tsonsi. Nane tsequi a'ta Na'su Chiga que'ima pañambisi qui i'na'faya.

¹⁹Tsa'ma aindecuja Samuelma pañañe chi'gapa su'fa:

—Cuin'qqe tsa'caen daye. Tisupa gi ande na'suve in'jan'fa ²⁰ingi'qqe faesu ande'su aindecuja'caen na'supa canseye. In'jan'fa gi cuintsu tise ingima mandapa ingi iyicco'je'choma ñoquian'jeñe toya'caen ingima angacamba ingi'su sundarondecuma'qqe angapa geraen'jeñe.

²¹Tsonsi Samuelja aindecu su'choma pañamba pa'ccoma conda Na'su Chiganga. ²²Condasi Na'su Chigaja su:

—Tise'pa in'janquia'caen ande na'suve ttu'sepa ca'niajan.

Tsonsi Samuelja aindecuma manda cuintsu poi'ico toequi tise'pa canqueni ja'faye.

9 ¹Israe'su Benjamín aindecu'su tsu fae a'i, tise inise Cis. Cis yaya tsu Abiel, tsa Zeror dutssi'ye. Zeror yaya tsu Becorat, tsa Afía dutssi'ye. Afíaña ñoa'me tayopi'su Benjamín a'i. Poi'ico a'i Cisma ñotsse in'jan'fa. ²Tiseja Saúl yaya tsu. Chu'a tsandie Saúlja ñoa'me ñotssia quin'an a'i. Nane poi israendecu'su tisema ti'tsse bove ñotssiaja can'jembi. Tiseja bia'asi cca'indeccuja aquia tise opipa'chongayi nepi'fa.

¹⁵Saúl toya Samuelma cachuimbi'te Na'su Chigaja tayo Samuelnga conda: ¹⁶“Tu'i, chiga ja'ñoa'can'ni ñajan queni moeñe tson'jen Benjamín a'i'su tsandiemá. Tise jisi tise tsovema aseite'ccu fetija tsa a'i ande na'suve daya'cho qquen canjañe. Tise tsu ña aindecuma ccushaëña filisteondecuyé. Nane ña aindecu vana'jemba ina'jen'fasi gi tise'pama pañamba ccushaëña.” ¹⁷Omboe Saúl jisi Samuel tisema atesi Na'su Chigaja su: “Va tsu ña su'cho tsandieja. Tise tsu ña aindecuma mandaya na'suve dapa.”

Samuel Saúlma feti Israel na'suve

10 ¹Tsonsi Samuelja aseite an'bianque'su can'choma isupa Saúl tsovenga fiñamba tisema mochapa su:

—Qquen gi canjaen Na'su Chiga quema ttu'sepa Israel ande na'suve ca'nia'choma. Nane tise aindecuma qui mandapa tise'pama ccushaëña filisteondecuyé.

²⁴Tsa'caen tsomba Saúlma aindecunga canjaemba su:

—¡Ñotsse can'faja Na'su Chiga ttu'sesi que'ima manda'su Israel ande na'suma! ¡Majañi'qqe faesu israe'su aindecu'suja tisia'cambi tsu!

Tsonsi poi israendecuja su'fa:

—¡Bo'tsse canseja israe'su na'su!

Omboe, israendeccu filisteondeccui'ccu geraen'fasi Saúlja Samuel jiya'chove ronda'je. Samuelyi tsu oquepa afe'choma Chiganga afe'su. Tsa'ma uta jimbisi Saúl iyicca'yepa tisuja afe'choma isupa oque o'raen. Tse'faei'ccuyi Samuelja ji.

Samuel Saúlma iy'u'cho

13 ¹³Samuelja Saúlnga su:
 —Queja ñoa'me sumbie dapa qui tson. Nane Na'su Chiga quenga manda'choma catipa qui injanga tson. Que tise manda'choma in'jan'choecan'da tsu Chigaja tsangae quema Israel na'suve an'biañe'can. ¹⁴Tsa'ma ja'ño tise manda'choma pañambisi tsu Na'su Chigaja quema somboemba faesuma ca'niaña tise aindecumbe na'suve. Nane tsa tsandieja ñoa'me Chiga in'janquia'caen tsu in'jaña.

Na'su Chiga Saúlma chi'ga'cho

15 ¹Tsomba Samuel Saúlnga su:
 —Na'su Chiga ñama mandasi gi quema ca'nia israendecumbe na'suve. Tsa'cansi ñotsse pañajan ²Na'su Osha'choma Oshacho'cho Chiga quenga qquen su'choma: 'Tayoe israendeccu Egiptone sombopa va andeni ji'fasi tsu amalecitandeccuja se'pipa tise'pa ji'je'cho tsaiquima picco'fa. ³Tsa'cansi japa amalecitandeccu'ccu iyiccopa nanitsse tise'pama fi'tti'faja. Nane pa'cco tise'pambema tsu tsangae catiya'cho. Tsandiendeccu, pushesundeccu, dushundeccu, aipanondeccuma'qqe fitti'ttipa toya'caen tise'pa vaura, oveja, cameyo, boroma'qqe tsu pa'tssima metsse fitti'tti sefaña'cho.'

⁷Tsa'caen mandasi Saúlja Havila andeni ashaemba Shur andepi (tsaja Egipto pporotsse) amalecitandecuma fitti'ttiye ashaen. ⁸Nane matichi'ccu poi amalecitandecuma fittitti'ma amalecita'su na'su Agagmajan indipa fi'ttimbeyi an'bian. ⁹Toya'caen Saúlja, tise'pa sundarondeccui'ccu bove ñotssia oveja, vaura, yayapatssia vaura du'shu, oveja du'shuma'qqe —nane osha'cho ñotssiam a fi'ttimbeyi antte'fa. Tsa'ma osha'cho barembi'choamajan metsse fittitti'fa.

¹⁰Tsa'caen tson'fasi Na'su Chigaja Samuelnga su:

¹¹—Ñombi'ye gi Saúlma na'suve ca'niamba. Nane tiseja ñama catipa ña manda'choma pañambisi gi ñombi'ye.

Samuelja Na'su Chiga su'choma pañamba injama'choni zuccopa pa'cco cose Na'su Chigama iñajan'jen. ¹²Iñaján a'tapa sinte jangipa Saúlma cachuiye ja. Japa paña Saúl Carmelni ja'chove. Nane Carmelni japa tsu patuma jangian ccutsian a'i tise patsul'choma aqqe'pa'fasa'ne. Tsa'caen ccutsiamba sombopa shoquendí Gilgalni ja. ¹³Gilgalni can'jen'choma pañamba Samuel tseni jasi Saúlja tise ma su:

—Na'su Chiga cuintsu quema ñotsse tsonjan. Tayo gi tise mandaquia'caen tson.

¹⁴Tsa'ma Samuelja Saúlma su:

—Tsa'caen tson'ninda ¿jongoesuma gi vaura fundojequia'caen toya'caen oveja afa'jequia'caenda paña?

¹⁵Tsonsi Saúlja su:

—Sundarondeccuja osha'cho amalecitandeccumbe jincho'choma metsse fitti'tti catipa tsu majan bove ñotssia vaura, bove ñotssia ovejama'qqe anttepa vani i'fa Na'su que Chiganga afeye.

¹⁶Tse'faei'ccuyi Samuelja su:

—¡Ziyaja! Na'su Chiga ja'ño cose ñanga condase'choma quenga condaye. Ziyapa Saúlja su:

—Afaja.

¹⁷Tsonsi Samuelja su:

—Tayoe tisuja joccapitssiambi qqen injan'jen'cho qui ja'ño poi israendeccumanda'je. Nane Na'su Chiga quema ttu'sesi qui Israel na'suve da. ¹⁸Toya'caen amalecitandeccu egae tsinconsi tsu Na'su Chigaja quema manda japa tise'pama fitti'tti sefaeñe. Gerave tsomba tise'pama sefaeña'gae fitti'ttiye mandasi ¹⁹¿micomba qui Na'suma pañambi? ¿Jongoesie qui Na'su Chiga tsa'caen in'jambi'choama amalecitandeccu an'bian'choma tismbe isu?

²⁰Pañamba Saúlja su:

—Tsa'ma ñoa'me gi Na'suma pañamba tsa'caen tson. Nane amalecitandeccumanda fitti'tti sefaemba gi tise'pa na'su Agagma vani i.

²¹Sundarondeccuja amalecitandeccu an'bian'cho'su bove ñotssia vaura toya'caen ovejama itsapa vani Gilgalni i'fa oquepa Na'su que Chiganga afeye.

²²Tsonsi Samuelja su:

¿Na'su Chigata ti avujaya oque oraemba afe'ninda?

Nane ti'tsse avujatssi tsu tise manda'choma pañasi.

Ñotsse pañañe tsu afe'choma bove ñotssi.

²³Chiga su'choma chi'ga'cho tsu

cocoyama in'janquia'caen tson'cho.

Tisuyi in'jan'cho tsu

ñoña'cho chigama in'janquia'caen tson'cho.

Nane que tise su'choma chi'gasi

tsu quema ande na'suve an'biañe chi'ga.

Davidma feti'cho na'suve

16 ¹Tsonsi Na'su Chigaja Samuelma su:

—¿Mi'nge'e qui Saúlne ñombi'ye? Tsangaeyi gi chi'ga tise ande na'suve ti'tsse can'jeñe. Tsa'cansi queja que aseitema angaqqe'su can'chonga aseitema on'boemba jaja Belén canqueni. Tseni nepipa Isái tsaoni jaja. Nane tayo gi in'jamba ttu'se fa'e tise dutssiyendeccu'su cuintsu Israel na'suve daye.

²Pañamba Samuelja su:

—¿Ma'caen gi tsa'caen tsoña? Nane Saúl tsama paña'da tsu ñama fi'ttiya.

Tsonsi Na'su Chigaja su:

—Vaura pushe du'shuma angapa suja: 'Ña gi ji quei'ccu Na'su Chiganga vama fi'ttipa afeye.' ³Toya'caen Isaíma ttu'seja cuintsu quei'ccu Chiganga

afe'choma fi'ttiye. Tise jisi gi quenga condaya ma'caen tsoña'choma. Nane ña quenga canjaen'choma qui fetiya na'suve.

⁴Tsonsi Samuelja Na'su Chiga suqquia'caen tson. Beléni japa nepisi tsa canqque'su coenzandecu ttun'dundu'je dyopa tisenga jipa su'fa:

—¿Avujatsse ti qui ji?

⁵Tsonsi Samuelja su:

—Avujatsse gi ji. Na'su Chiganga afeye fi'tti'choma afeye gi ji. Que'i poiyo'cco qui tisupama Chiga in'janquia'caen ñoña'cho. Noñamba ñai'ccu ji'faja Chiganga afe'jeni.

Toya'caen tsu Samuelja Isaí tise dutssiyendecuma'qque ttu'sepa ñoña cuintsu Chiganga tise afe'jeni ji'faye.

⁶Tise'pa nepi'fasi Samuelja Eliabma atepa qquen asi'ttaen: “Ñoa'me va a'i tsu Na'su Chiga in'jan'cho ande na'suve.”

⁷Tsa'ma Na'su Chigaja tisema su: “Ni tise cambia'ju ni tise quin'suma canjama. Nane tayo gi tisema joquitssian, a'i canquiacambi tsu ña a'ima caña'jen'cho. Nane a'ija cambia'juma caña'jen. Tsa'ma ñajan a'i injama'cho'su in'jan'choma caña'jen.”

⁸Tsonsi Isaí Abinadabma ttu'se cuintsu Samuelnga ccutsuye. Tsa'ma Samuelja tisema atepa su:

—Me'in, va'qque tsu Na'su joquitssian'cho.

⁹Omboe tsu Isaíja Samama ttu'sepa ccutsian. Tsa'ma Samuelja tisema atepa su:

—Me'in, va'qque tsu joquitssian'cho.

¹⁰Tsa'caen Isaíja siete tise dushundecuma Samuelnga ccutsian'ma Samuelja poiyo'ccoma su Na'su Chiga joquitssian'cho tsu. ¹¹Tsomba Samuelja Isaíma iñajampaña:

—¿Faesu du'shuveta ti qui an'biambi?

Tsonsi tsu su:

—Toya tsu fae'cco ñoa'me chu'a can'jen. Tiseja ovejama coira'su tsu.

Tsonsi Samuelja su:

—Mandaja cuintsu i'nga'faye. Nane tise toya jimbi'te ashaeñe oshambi gi.

¹²Tsa'caen susi Isaí mandasi i'fasi chu'aja cujijutssia du'shu ji. Ñoa'me me'detssipa tise cambia'ju'qque ñotssia.

Tsonsi Na'su Chigaja Samuelnga su:

—Va tsu ña in'jan'cho. Jangipa tisema fetija ande na'suve.

¹³Tse'faei'ccuyi Samuelja aseite an'bianqque'su can'choma isupa chu'ama feti ande na'suve poiyo'cco tise quindyandandecu camboen'jen'fa'ni. Tsa chu'aja David tsu. Tisema na'suve fetisi tsu Na'su Chiga Qquendya'pa tisema in'jaemba quiñaen. Omboe Samuelja Ramón ja.

David filisteo Goliatma fi'tti

17 ¹Filisteondeccuja tise'pa sundarondeccuma ttu'sepa bo'fa Judá'su Soco canqueni. Nane Efes-damimni tise'pa carpama ccutsutsian'fa.

Tsata tsu Soco toya'caen Azecambe enttingeni. ²Tsa'caen tson'jen'fasi Saúl'qqe israendecui'ccu Ela sinjunccuni bopa tise'pa carpama ccutsutsian'fa. Bopa ñoña'fa filisteondeccui'ccu geraemba iyiccuya'chove. ³Nane filisteondeccu fae ccotta'cconi can'jensi israendeccuja faesu ccotta'cconi can'jen'fa. Tsa dos ccotta'ccombe enttingeni tsu sinjunccuja jin. ⁴Tsa'caen bo'fasi tse'fae'ccuyi tsu filisteo sundarondeccu'su fae'cco rande sundaro sombo. Nane tiseja tres metro bia'a. Tise iniseja Goliat, Gat canqque'su a'i tsu. ⁵Tise tsovenga tsu cu'a yoshava ontsianccuma ontsian. Toya'caen utu'chonga tsu cu'a yoshava contoma ejian. Tsaja tssai'a, fae quintal. ⁶Tise ttena'goma piccoqque'su'qqe tsu cu'a yoshavama ñoña'cho. Tise opipa'choni tsu cu'a yoshavama ñoña'cho dansan'choma an'bian. ⁷Tise oma'ccoja ñoa'me randepa tombutssi tsu, tsa'o ottaen'coa'ca'on. Toya'caen oma'cco tsutopanga tsu yoshavama ancaen'cho. Tsa'qqe catorce librave tssaiña. Tisema shondo'su sundaro tsu tisema o'tie jayi. ⁸Sombopa ccutsupa Goliatja israe'su sundarondeccunga su:

—¿Jongoesie qui geraeñe sombo'fa? Ñajan filisteosi que'ija Saúlma paña'fa. Tsa'camba fae'cco que'i'suma in'jamba ttu'se'faja cuintsu andepa ñai'ccu iyiccoye. ⁹Nane tise ñai'ccu iyiccopa ñama fi'tti'ninda gi ingi poi'yi'cco que'imbe tsangae semasundeccuve da'faya. Tsa'ma ña tisema patsupa fi'tti'ninda que'i qui ingimbe tsangae semasundeccuve da'faya. ¹⁰Ja'ño a'ta gi israe'su sundarondeccuma noñangiamba afase: ¡Ñani moe'faja fae'ccoma cuintsu ñai'ccu iyiccoye!

¹¹Saúl toya'caen poi'yi'cco israendeccu filisteo aya'fama pañamba ñoa'me pa'ye'e dyo'fa.

¹²Belén canqueni tsu Judá'su a'i can'jen, tise inise Isaí. Nane Saúl can'jeinte Isaija ñoa'me coenza ccashe'yeve dapa ocho dutssiyendeccuve an'bian. Fae'ccoja David tsu. ¹³⁻¹⁴Isaí dutssiyendeccu'suja tres ti'tsse coenzandeccu tsu sundarove dapa Saúl'ccu jacan'fa. Nane aisheve isu'cho tsu Eliab. Tse'tti'su tsu Aminadab toya'caen Sama. Davidja toya chu'apa ¹⁵sundarondeccui'ccu can'jembi'ma Saúl'ni japa toequi Beléni shanda tise yaya ovejama coira'jeye.

¹⁶David tseni can'jeni tsu cuarenta a'tave filisteo Goliatja israendecuma noñangiamba afaseye sombo'je. Nane sinte sime'qqe sombopa noñangiamba afase.

¹⁷Fae a'ta Isaija tise dutssi'ye Davidnga su:

—Trigo sheje'cho'pama veinte litrove toya'caen diez panme isupa junde angaja que quindyandecuni tsa sundarondeccu can'jeni. ¹⁸Toya'caen va diez quesoma angaja tise'pa sundaro capitánga. Que quindyandeccu ma'caen can'jen'choma ñotsse pañamba jipa ñanga condaja ña tise'pa ñotsse can'jen'fa qqen in'jañe.

¹⁹Tsa'caen tson'jen'ni Saúl, David quindyandeccu toya'caen poi israe'su sundarondeccu tsu Ela sinjunccuni can'jen'fa filisteondeccui'ccu iyiccoye.

²⁰Ccaqui a'ta sinte'yi Davidja faesu ovejama coira'sui'ccu ovejama catipa tise yaya Isaí afe'cho anqque'suma isupa tsaiqui'ye ja sundarondeccu can'jeni

jaye. Tise nepi'ccu tsu sundarondeccuja filisteondeccui'ccu iyiccoye sombopa fundo'fa geraeña'chove. ²¹Nane israe'su toya'caen filisteo'su sundarondeccu tsu isevetsse fae'ngae ccutsu'fa geraeña. ²²Tsonsi Davidja tise i'cho anque'suma sundaro andu'choma coira'sunga catipa buttopa ja sundaro bo'jeni tise quindyandeccoma attepa chigambiaña. ²³Tsendecui'ccu tise condase'je'ni tsu ccase Gat canque'su Goliatja filisteo'su sundarondeccu'ye sombo. Nane tsa ti'tsse'tssia sundaroja tayoe tise afaquia'caen ccase israendeccoma noñangiamba afase. Tsa'caen afase'je'choma Davidja paña.

²⁴Israe'su sundarondeccuja tise ma pañamba dyopa tse'ttie butto joqquitssipa ²⁵su'fa: “¡Ay! ¿Atte'fambi ti qui va ja'ño sombo'cho a'i, israendeccoma noñangiamba afaseye ji'choma? ¿Majan tsu tise ma patsuye osha? Nane majan jovama patsu'ninda tsu na'su Saúlja tsama ricove tsomba tise onque'ngema'qqe tisenga anteya cuintsu pusheye. Toya'caen tsu tsa a'imbe antiandeccuja pasa'faya jongoesuveyi'qqe gobiernonga afepoen'jen'chove metssia've.”

²⁶Tsonsi Davidja tisei'ccu pporotsse ccutsundeccoma inajampaña:
—¿Jongoesuma tsu afe'faya majan va filisteoma fi'ttipa israendeccu shacama ccucha'nija? ¿Majan gi qqen tsu in'jan va Chigave in'jambi'choaja? Nane tiseja joccapitssia qqen in'jamba tsu Tsangae Canse'su Chigambe sundarondeccuma afase.

²⁷Tsa'caen inajampañasi tsu tayoe suquia'caeni ccase su'fa ma'caen Goliatma fi'tti'sunga ñotsse tsoña'choma. ²⁸Tsa'ma David quindya, Eliab, pa'cco David faesu tsandiendecui'ccu condase'je'choma pañamba Davidma iyicca'yepa su:

—¿Jongoesie qui vani ji? ¿Majain'ccu qui va'cha ovejama a'i menia catipa ji? In'jan gi que injama'cho egae in'jan'choma. ¡Nane in'jangae tsincomba qui aquia sundaro iyicco'je'choma can'boeña ji!

²⁹Tsa'ma Davidja su:

—¿Tsoin'jan mingae gi tson'jen? Aquia gi inajampaña'jen.

³⁰Tsomba tise quindyama joqquitssipa faesuma'qqe inajampaña. Inajampañasi tsa'qqe faesundeccu suquia'caeni su. ³¹Tsonsi majan Davidma pañasundeccuja japa tise inajampaña'choma Saúlnga conda'fa. Saúlja pañamba Davidma ttu'seye manda. ³²Ttu'sesi Davidja Saúlnga jipa su:

—In'jambi gi majañi'qqe injama'cho shacapa Goliatma dyo'faye. Na quema shondo'su gi va filisteoi'ccu iyiccopa tise ma fi'ttiya.

³³Tsa'caen susi Saúlja su:

—Noa'me queja va filisteoi'ccu iyiccoye oshambi. Nane queja toya chu'a. Tsa'ma tiseja chuitepie sundarove atesupa coen.

³⁴Tsonsi Davidja su:

—Na quema shondo'suja ña yayambe ovejama coira'jesi ttesi tsambi'ta oncomari jipa oveja sheque'cho'suma fae ovejave anga'ninda ³⁵tise ma omboemba gi tise aya'fa'suma itsa. Nane ñama iyicca'ye'ninda gi tise

ccotai'cco'ye indipa tise ma ochha'chha fi'ttiya'ngae. ³⁶Tsa'caen gi ña quema shondo'suja ttesi toya'caen oncomarima'qqe fi'tti'je. Nane tsa'caen gi tsoña va Chigave in'jambi'choa filisteoma, tise joccapitssia qqen in'jamba Tsangae Canse'su Chigambe sundarondeccuma afase'chone. ³⁷Na'su Chigaja ttesi toya'caen oncomari'ye ñama ccushaen fi'ttipa ansa'ne. Tsa'caeni tsu ñama ccushaena va filisteo'ye.

Tsonsi Saúlja su:

—Ñotssi tsu. Na'su Chiga quei'ccu jasi japa fi'ttija.

³⁸Tsomba tse'i Saúlja Davidma ondiqquiañe ashaen tisu sundaro yoshava ondiccu'jema. Toya'caen tsu cu'a yoshava ontsianccuma ontssiamba yoshava contoma'qqe tisenga ejian. ³⁹Osefa'poe tsama ombanga Saúlme sundaro matichima tise utuqui'fanga ancaensi Davidja tsui qqen tson'ma oshambi. Nane sundaro ondiccu'jema atesumbipa tsa'caen oshambipa junde Saúlma su:

—Oshambi gi pa'cco va onccan'choi'ccu. Nane atesumbi gi qqen ondiccupa jaye.

Tsa'caen supa pa'ccoma oshichhapa cati. ⁴⁰Catipa tise ovejama coira'je'cho quini'ccoma isupa nai'quini japa tta'ttapa atte faefayi'cco funui'cho'cco patu chipirima. Tsama atepa ppiña tise matiriccunga. Tsomba tise botacho'fama isupa ja filisteoma cachuiye. ⁴¹Jasi filisteoja tise ma fuite'suma omboe Davidnga catse. ⁴²Filisteoja Davidma atepa ñoa'me chu'a me'deccopa toya cujijutssi qqen in'jamba aquia cofe'je qqen in'jamba ⁴³qqen su:

—¿Ñanda ti gi ain? ¿Jongoesie qui tsa'caen quini'cco'ccu ñama ochhaiye ji?

Tse'faei'ccuyi Davidma afaseye ashaen. Nane tisu chigama'qqe iñajan Davidma egae tsoñe. ⁴⁴Toya'caen tsu su:

—¡Jija! ¡Ña quema fi'ttipa que nama o'fiaña ccompananga toya'caen ttesinga!

⁴⁵Tsa'ma Davidja su:

—Queja matichi, oma'cco toya'caen dansan'choi'ccu ñai'ccu iyiccoye ji. Tsa'ma Na'su Chiga, Osha'choma Oshacho'cho, tsa que afasepa noñangian'cho israel'su sundarondeccumbe Chiga, ñama fuitesi gi quei'ccu iyiccoya. ⁴⁶Ja'ño tsu Na'su Chiga quema patsupa ñanga afeya cuintsu quema fi'ttipa que tsovema'qqe chattu catiye. Toya'caen filisteo'su sundarondeccu ai'voma gi afeya ccompananga toya'caen ttesinga. Tsa'caen tsonsi tsu poi'cco a'i atesu'faya Chiga Quitsa israendeccui'ccu can'jen'chove. ⁴⁷Nane poi'cco vani bo'fa'cho tsu atesu'faya Na'su Chigaja ingi matichi'ccu ni ingi oma'cco'ccu patumbicho've. Tsa'ma Na'su tsu patsuya. ¡Nane tise tsu que'ima patsupa inginga afeya!

⁴⁸David tsa'caen susi filisteoja jangipa Davidnga catse. Tise catsesi David'qqe buttopa filisteonga catsepa ⁴⁹tise matiriccuma tsomimba patuma somboen. Somboemba botacho'fanga ppiñamba filisteonga ttova. Ttovasi cambia'junga depa ca'nisi filisteoja andenga puvie amppi ccui. ⁵⁰Tsa'caen tsu Davidja filisteoma patsu. Nane botacho'fai'ccuyi fae patui'ccuyi Davidja tise ma fi'tti. Toya'caen sundaro matichima angambipa

⁵¹buttopa panjin ccui'cho filisteonga catsepa ombanga ccutsupa tsambe matichima somboemba tsai'ccu tise ma fi'tti. Fi'ttipa tise tsovema chattu.

Tsonsi filisteondeccuja tise'pa ti'tsse quin'an sundaroma fi'tti'choma attepa cuyayin ja'fa. ⁵²Ja'fasi israendeccu toya'caen Judá ande'su sundarondeccu fundopa mandian'fa. Nane geraemba iyicco'jene fundopa Gat canqqe'su sombo'ttinga ne'pitsse tise'pama mandian'fa. Toya'caen Ecrón canqqe sombo'ttinga'qqe ne'pitsse tise'pama mandian'fa. Tsa'caen mandiamba fittitti'fasi pa'cco Saaraim tsaiquini Gat toya'caen Ecróni ja'je'cho tsu filisteo sundarondeccu pajin ccui'choma atte'fa.

⁵³Tsa'caen filisteondeccuma mandiamba fitti'ttipa toequi shandapa tise'pa carpani jincho'choma isu'fa. ⁵⁴Tsonsi Davidja filisteo tsovema Jerusaléni anga. Tsa'ma filisteo oma'cco, matichima'qqe tsu tise carpanga ca'niamba an'bian.

⁵⁵Tsequi a'ta David filisteoi'ccu cachuiccoye jasi na'su Saúlja tise ti'tsse'tssia sundaro na'su Abnerma ñajampaña:

—Abner, ¿majan tsu va du'shumbe yaya?

⁵⁶Tsa'ma Abnerja su:

—Nane ñoa'me atesumbi gi.

Tsonsi na'su Saúlja manda:

—Majama mandaja cuintsu atesuye.

⁵⁷Tsa'caen tsonsi David filisteoma fi'ttipa tsambe tsovema anga jisi Abnerja tise ma attepa Saúlnga i. ⁵⁸Isi Saúlja tise ma ñajampaña:

—Jaricho, ñanga condaja ¿majambe du'shu qui?

Ñajampañasi Davidja su:

—Ña gi Isaí dutssi'ye, tsa Beléni can'jemba quema shondo'su.

Tsomba tse'i Davidja Saúl sundarondeccunga ca'nisi Saúl tise ma ccutsian sundaro na'suve. Geraemba ñotsse patsusi tsu poi aindeccu Saúlma ti'tsse Davidma in'jan'fa. Tsa'caen in'jan'fasi, Saúlja injama'choni se'pipa Davidma chi'ga. Toya'caen David jai'ngae na'suve daya'cho qqen in'jamba tise ma fi'ttiye in'jan. Tsa'cansi Davidja cca'tti cca'tti japa a'tu Saúl tise ma fi'ttisa'ne.

David Saúl'ye ccuya'cho

21 ¹Chigai'ccu cachuicco'je'tti Nobni ccutsusi Davidja Saúlne ccuyapa Chigama afa'su Ahimelecma can'su ja. Nepisi Ahimelecja dyoe'sui'ccu sombopa su:

—Queja sundaro na'supa ¿jongoesie qui tisuyi ji? ¿Micomba tsu faesundeccu quei'ccu jacan'fambi?

²Tsonsi Davidja su:

—Na'su tsu ñama manda tise in'jan'chove tsoñe. Toya'caen tsu se'pi faesu jongoesune ñama moe'chove atesusa'ne; ni ñama tise mandasi tsoña'choma atesusa'ne. Ñama mandasi fae'ngae jacansundeccu tsu ña condase'je'ttinga ñama cachui'faya. ³¿Anqqe'suta ti vani jin? Nane quipoe'su gi cinco panme tsambi'ta mañi'cooe an'bian'da ñanga afeja.

⁴Tsa'ma Chigama afa'suja Davidma su:

—Aqquia injanga anqqe'su panjan vani jimbi. Nane Chiganga afe'cho pañi tsu jin. Tsa'ma que aindeccu pushesundeccui'ccu can'jembian'da gi tsa'suma quenga afeya.

⁵Tsonsi Davidja ñoa'metsse su:

—Nane majan sundarove ñai'ccu jacan'da tsu pushesui'ccu can'jembi. Tsaveqqe'su tsu. Tsa'ma ja'ño ti'tsse a'tutsse jacamba gi tsa'caen can'jen'fambi.

⁶Tsa'caen susi Chigama afa'suja tsa Na'su Chiganga afe'cho panma Davidnga afe. Nane tsa panjan, tsequi a'ta cuname matssan'cho panma Na'su Chiga cachuicco'je'ttinga ppiñaña'ba somboen'cho panma tsu afe.

Saúlpa pa'fa'cho

31 ¹Filisteondeccu israendeccui'ccu iyiccosi tsu israendeccuja ccuya'fa. Nane tsain'bitssi israendeccu tsu pa'fa tsa Gilboa ccotta'ccongá.

²Filisteondeccuja Saúl, tise dutssiyendeccuma'qqe mandiamba tsu Jonatán, Abinidab toya'caen Malquisúama fittitti'fa. ³Tsendeccuma fitti'ttipa tsu ti'tsse Saúlma mandian'fa. Tsa'caen tsomba battittiansundeccu tisenga catsepa de'jian'fa. ⁴Desi Saúlja paye tson'jemba tisema shondo'su sundaroma manda:

—Que matichima isupa ñama quiccu po'taenjan ña junde paye. Tsambi'ta va Chigave in'jambindeqquia tsu jipa ñama fi'ttipa ñai'ccu co'fe'faya.

Tsa'ma tisema shondo'su sundaro dyojopa in'jambisi Saúlja tisu matichima isupa tsanga amppi cuintsu tisenga depa po'taye. ⁵Tsa'caen pasi tisema shondo'suja attepa tise'qqe tisu matichima isupa tsanga amppi Saúli'ccu fae'ngae paye. ⁶Tsa'caen tsu fae a'taja Saúl, tise tres dutssiyendeccu, tisema shondo'su sundaro toya'caen poi'ccu tise sundarondeccu'qqe fae'ngae pa'fa.